

COMUNICATO n. 486 del 27/02/2026

Sai' kemmen pfaiert ver de sai'na sportgabung de Serena Pergher ont der Michele Malfatti atletn va Milano Cortina 2026

Oachpèrg vaiert de sai'na gabinger, Fugatti: "S ist an ear ver en gònze Trentin"

[Mòcheno] A gamoa'schòft as vaiert de sai'na gabinger: en gamoa'sportzimmer van Oachpèrg, voll va lait ont va familie, en mita as de 25 van hourneng sai' kemmen official derkennt ver de sai'na sportgabung de atletn Serena Pergher ont Michele Malfatti ver en sèll as de hom gabungen en de binter Olimpische Spiln Milano Cortina 2026. S hom toalganommen der president va de Autonome Provinz va Trea't Maurizio Fugatti, der president van Provinzalrot Claudio Soini, der president van Tolgamoaschòft Hoa Valzegu' ont Bersntol ont pirgermoaster van Oachpèrg Andrea Fontanari ont vil òndra lokal autoritetn, de provinzal consiliarn Walter Kaswalder, Vanessa Masè ont Stefania Segnana, de pirgermoastern van Bersntol ont nou der president van CONI Trea't Paola Mora, der techniker van aislaf ont goltmedailen ka Torino 2006 Matteo Anesi ont ver trentiner olimpische iberschauer Paolo Bouquet. "Benn ber schaug biavle olimpische medailen as s inser lònt hòt ens trong, mei ber song as de sòchen kemmen rècht gatu' - hòt er tsòk der president Fugatti -: de sportivgasellschòftn hom gabellt hèlven pet de sai'na vraibellega lait, ont s doi hòt gaholven za hom guata riven, de gònze gamoa'schòft hòt zòmmgaòrbetet, de amministratorn va hait ont va gester hom gaglap en de zuazoln en de sportivinnrichtn. S ist an ear ver en gònze Trentin as hòt galòck sechen as der ist guat za organisarn se, as hòt glenzn gamòcht de inser Autonomi, zòmm pet de insert gabinger. Iaz schau ber envire pet sicherkait, en de Paralimpiadi, en de Olimpiadi van 2028, en Bèltciclismus van 2031".

A groasa liabekait ont ear ver de gònze gamoa'schòft; s hom toalganommen en mol de derstelltn van lokal vraischòftn, de kinder va de earste schual van òllgamoaschual Pergine 1 ont an etlena jungen toalnehmer van Gamoa'rot van kinder aa. Asn palko hom se ogabèckst de autoritetn ont hom trong de sai' kuntschòft de gabinger, as hom de sai'na familie glaim gahòt: de Serena Pergher, as hòt 22 jor as de 26 van hourneng, Gs Fiamme Oro, as hòt kriak der bichte viarte olimpische plòtz en de vinfhundert baibermetre Speed Skating - gahasse aislaf asn ais ont der Michele Malfatti, as hòt 31 jor, Gs Fiamme Gialle, as hòt kriak de goltmedailen en de spezialitet van nolaven en mònnschòft (Team Pursuit 3200 metre).

Der Michele Malfatti hòt gadenkt de sèlln verzauberte momentn: "Ka Pechino sai ber de voulderleistn gaben, ber hom praucht jarder va òrbet ont technische verpersern: sechen se der entram van an iatn atlet as boret kimm ist an groasn vrait ont men ist zavrin".

"I hon nèt kummern ont leider, i hon òlls gem ont i hon mer nèt gabòrtn der viarte plòtz ver drai cent van bronz. S lem van an atlet ist schea', ober men miast vil offer mòchen. Sechen de familia ont de kamaròtnn as tifarn ver mi hòt mer gem vil kròft ont an schupf va mear", hòt se tsòk de Serena Pergher.

Der pirgermoaster Fontanari hòt augatu' s mol pet en unterstraichen de groas kreft ont offer as de atletn hom gatu' ver za hom de doin gabing. "Hait tea ber nèt lai vaiern de sportivgabung ober de identitet van a gamoa'schòft as guat ist za bècksln de aigene gabing en an zòmmear. En de inser kloa' gamoa'schòft mu' augea eppes va groases. Der doi prais ist an simbolische druck va de inser gamoa'schòft".

De Paola Mora hòt gadenkt as de zboa gabinger kemmen va Mala van Oachpèrg:"A gabing va Guinness. Hintn en òll atlet hòts a familia as geat en no, s hòt trainer as sai' vrea gaben ver de earstn prais ont hom en gamòcht gearn hom der sport, s hòt sportvraischòftn ont gamoa'schòftn as hom sa u'ganommen. Der Trentin hòt gabungen en de Olimpiadi gèltsgott en de zòmmhìlf van vraibellega ont va de sportivorganizazion".

"De Olimpiadi sai' an ausònder sporttrèff, der meareste tsechen en de gònze bèlt, s ist gaben a schea'na postkòrt ver de inser lòntschòft. Vil de vraibellega as no stea' en de jungen as derno kemmen gabinger. I padonk sa ont padonk me pet en president Fugatti ont pet òlla de sèlln as hom gabellt trong de Olimpiadi en Trentin, de lait as hom organisart, der Coni, der Olimpischekomitat. Ber bòrtn iaz der bichte moment van Paralimpiadi", hòt er tsòk der Soini.

Paolo Bouquet hòt unterstraicht as gabingen a medaia ist an groasn ear ver an atlet ober aa a groasa responsabilitat: "ver za abibarn en sèlla riven s prauchen jarder va òrbet ober aa gèltzuazoln ver internazionaln sportivinnrichtn as sai' an socialpahalter ver de gamoa'schòftn. Ber miasn nèt vergèssn aa as der sport ist technologi ont untersuach aa".

Letrattdinst ont filmat gamòcht van druckdinst
Download pilder ont interviste [do](#)

Ibersetz gamòcht van Sprochtirl va de Tolgamoas'schòft Hoa Valzegu' ont Bersntol

<https://www.youtube.com/watch?v=zs6xQLN8MA>

<https://www.youtube.com/watch?v=rZeQS3cysAc&t=2s>

<https://www.youtube.com/watch?v=sS-W9NadyZA>

(cdt)